

Ákvörðun nr. 23/2025
Miðvikudagurinn 18. júní 2025

Samruni Terra eininga ehf. og Tæki.is ehf.

1. Þann 27. maí 2025 var Samkeppniseftirlitinu tilkynnt um kaup Terra eininga ehf. (hér eftir „Terra“) á Tæki.is ehf. (hér eftir „Tæki.is“). Með tilkynningunni fylgdi styttri samrunaskrá í samræmi við 5. og 6. mgr. 17. gr. a samkeppnislaga og reglur Samkeppniseftirlitsins nr. 1390/2020. Með tölvupósti þann 28. maí 2025 upplýsti Samkeppniseftirlitið að nefnd samrunatilkynning teldist fullnægjandi. Með hliðsjón af 2. mgr. 8. gr. reglna Samkeppniseftirlitsins um tilkynningu og málsmeðferð í samrunamálum nr. 1390/2020 byrjuðu frestir til að rannsaka samrunann að líða 28. maí 2025. Við athugun á samrunanum leit Samkeppniseftirlitið til upplýsinga í samrunaskrá, fyrirliggjandi gagna og fyrri ákvarðana eftirlitsins.
2. Samkvæmt 17. gr. samkeppnislaga telst samruni hafa átt sér stað þegar breyting verður á yferráðum til frambúðar. Samruni getur þannig m.a. falist í því að fyrirtæki taki annað fyrirtæki yfir eða það nái yferráðum í heild eða að hluta yfir öðru fyrirtæki, t.d. með því að kaupa hluta af eignum þess eða þær allar sbr. 1. mgr. 17. gr. laganna. Með fyrrnefndum kaupum eignast Terra allt hlutafé í félaginu Tæki.is. Samkeppniseftirlitið telur í þessum kaupum felist samruni í skilningi 17. gr. samkeppnislaga.
3. Í samrunaskrá kemur fram að Terra sé dótturfélag í fullri eigu Terra umhverfisþjónustu hf. Í samrunaskrá kemur fram að starfsemi Terra felist í sölu og útleigu á húseiningum og gámalausnum. Terra umhverfisþjónusta bjóði upp á alhliða umhverfisþjónustu, m.a. losun íláta, móttöku á spilliefnum og raftækjum, skjalaeyðingu og leigu sérhæfðra íláta, gáma og tunna og kara.
4. Tæki.is var stofnað árið 1999 og er skráður tilgangur félagsins rekstur og útleiga vinnuvéla, tækja og skyldur atvinnurekstur. Félagið sérhæfi sig í tækjaleigu til fyrirtækja og einstaklinga og á félagið fjölda af vinnuvélum til útleigu, svo sem vinnulyftur, jarðvinnuvélar, lyftara, smágröfur o.fl.
5. Þar sem ekki er skörun í starfsemi samrunaaðila eða félaga í samstæðu þeirra, né er kaupandi að taka yfir starfsemi fyrirtækis sem framleiðir og/eða selur aðföng fyrir starfsemi hins, er hvorki um láréttan né lóðréttan samruna að ræða. Ljóst er því að fjárfesting og kaup Terra á Tæki.is telst til samsteypusamruna í samkeppnisréttarlegum skilningi.
6. Við mat á samruna samkvæmt samkeppnislögum verður að byrja á því að skilgreina þann markað eða þá markaði sem við eiga.¹ Af hálfu samrunaaðila er á því byggt í samrunaskrá að þeir markaðir sem Terra starfi á séu eftirfarandi: markaður fyrir sölu og útleigu á

¹ Samkvæmt 4. gr. samkeppnislaga er markaður sölusvæði vöru og staðgengdarvöru og/eða sölusvæði þjónustu og staðgengdarþjónustu. Hagfræðileg rök leiða til þess að líta verður á viðkomandi markaði frá tveimur sjónarhornum, annars vegar vöru- eða þjónustumarkaðinn og hins vegar landfræðilega markaðinn.



húseiningargámum/gámahúsum og markaður fyrir útleigu á flutninga- og geymslugámum. Í samrunaskrá er einnig á því byggt að Tæki.is starfi á markaði fyrir útleigu á vinnuvélum til fyrirtækja og einstaklinga. Í samrunaskrá kemur fram að rök mætti færa fyrir því að skipta slíkum markaði í undirmarkaði.

7. Samkeppniseftirlitið telur ekki tilefni til þess að ráðast í nákvæmari markaðsskilgreiningar en samrunaaðilar gera í samrunaskrá, enda ljóst að samrunaaðilar starfa á ólíkum mörkuðum. Samkeppniseftirlitið telur ekki forsendur til þess að véfengja markaðsskilgreiningar samrunaaðilar né þarf að taka formlega afstöðu til þeirra í ljósi takmarkaðra áhrifa samrunans.
8. Samkvæmt samrunaskrá er það mat samrunaaðila að viðskiptin muni ekki hafa nein samkeppnisleg áhrif á þeim mörkuðum sem þeir starfa á. Samrunaaðilar starfi á ólíkum mörkuðum og með samrunanum verði engin breyting á markaðshlutdeild aðila.
9. Samkeppniseftirlitið telur að um sé að ræða svokallaðan samsteypusamruna þar sem samrunaaðilar starfa ekki á sama markaði. Samkeppnisleg áhrif skapast því ekki vegna aukinnar samþjöppunar eða láréttra áhrifa. Þá er ekkert í fyrirliggjandi gögnum sem bendir til þess að skaðleg lóðrétt áhrif eða samsteypuáhrif leiði af samrunanum sem raski samkeppni umtalsvert með öðrum hætti.
10. Að öllu framangreindu virtu er það því niðurstaða Samkeppniseftirlitsins að engar vísbendingar séu um að samruninn komi til með að hindra virka samkeppni. Af þeim sökum er það niðurstaða eftirlitsins að hvorki sé ástæða til frekari rannsóknar né sé nauðsynlegt að aðhafast vegna samrunans. Lýkur því meðferð málsins á fyrsta fasa samrunarannsóknar.

Ákvörðunarorð:

„Kaup Terra eininga ehf. á öllu hlutafé í Tæki.is ehf. fela í sér samruna í skilningi samkeppnislaga. Samkeppniseftirlitið telur ekki forsendur til þess að hafast frekar að í máli þessu.“

Samkeppniseftirlitið

Páll Gunnar Pálsson